

CONVENIO DE COLABORACIÓN ENTRE O SERVIZO GALEGO DE SAÚDE, A AXENCIA GALEGA PARA A XESTIÓN DO COÑECEMENTO EN SAÚDE E A FUNDACIÓN PÚBLICA GALEGA DE INVESTIGACIÓN BIOMÉDICA GALICIA SUR PARA A XESTIÓN DA FORMALIZACIÓN DE CONTRATOS CONCEDIDOS AO INSTITUTO DE INVESTIGACIÓN SANITARIA GALICIA SUR (IISGS), AO ABEIRO DA CONVOCATORIA DA ACCIÓN ESTRATÉXICA EN SAÚDE (AES) 2025

MEMORIA XUSTIFICATIVA

O xerente do Servizo Galego de Saúde, DECLARA:

Que o Servizo Galego de Saúde e a Axencia Galega para a Xestión do Coñecemento en Saúde formalizaron, o día 18 de decembro de 2025, coa Fundación Pública Galega de Investigación Biomédica Galicia Sur o instrumento convencional arriba referido, cun prazo de vixencia de cinco anos a partir do día seguinte á súa sinatura, de conformidade co previsto no artigo 34.2 da Lei 14/2011, do 1 de xuño, da Ciencia, a Tecnoloxía e a Innovación, podendo ser prorrogado, por acordo das partes, por un período de ata outros 5 anos adicionais. Todo iso de conformidade co establecido no artigo 49 da Lei 40/2015, do 1 de outubro, de réxime xurídico do sector público.

Que o instrumento convencional ten por obxecto establecer o mecanismo de colaboración entre as partes para a formalización dos contratos das axudas concedidas ao Instituto de Investigación Sanitaria Galicia Sur (IISGS) a través da Fundación Pública Galega de Investigación Biomédica Galicia Sur (en adiante a Fundación) ao abeiro da convocatoria correspondente ao ano 2025 de concesión de subvencións da Acción Estratéxica en Saúde 2024-2027, e cuxo extracto foi publicado no «Boletín Oficial do Estado» de data 12 de decembro de 2024 e cuxo texto completo atópase publicado na Base de Datos Nacional de Subvencións con código identificativo 801915 e que lle corresponda formalizar ao Servizo Galego de Saúde por implicar actividades asistenciais.

Que existe converxencia de intereses entre as entidades asinantes en orden á consecución do obxectivo referido.

Que o instrumento convencional que se asinou se fundamenta no seguinte:

Que o Servizo Galego de Saúde, organismo autónomo adscrito á Consellería de Sanidade desde a súa creación pola Lei 1/1989 do 2 de xaneiro, ten entre as súas funcións a xestión das prestacións sanitarias e a xestión dos centros, servizos e establecementos sanitarios propios ou adscritos ao mesmo, así como o desenvolvemento dos programas de docencia que lle sexan encomendados pola Consellería, dentro da súa competencia ou que sexan necesarios para os seus fins.

Que polo Decreto 112/2015 do 31 de xullo, creouse a Axencia Galega para a Xestión do

Coñecemento en Saúde (en diante ACIS), adscrita a Consellería de Sanidade. Entre os seus fins xerais e obxectivos básicos está o de elaborar, en réxime de descentralización funcional, a planificación en materia de docencia, formación, investigación, innovacións e avaliación de tecnoloxías e servizos sanitarios, en función dos criterios e obxectivos de planificación estratéxica definidos polo Servizo Galego de Saúde e a Consellería de Sanidade e xestionar o coñecemento no Sistema Público de Saúde de Galicia.

Que a Fundación é unha fundación de interese galego en conformidade coa Lei 12/2006, do 1 de decembro, de fundacións de interese galego con personalidade xurídica propia e sen ánimo de lucro, modificada pola Lei 16/2010, do 17 de decembro, de organización e funcionamento da Administración xeral e do sector público autonómico. Que a Fundación ten por obxecto impulsar a investigación, a docencia, o desenvolvemento científico-tecnolóxico e a innovación no ámbito sanitario e en Ciencias da Saúde, así como a realización de outras actividades que poidan contribuír á consecución do obxecto fundacional, caracterizado polo interese xeral galego. Con ese propósito, a Fundación serve de apoio, asesoramento e xestión aos profesionais e investigadores, nos centros do Sistema Público de Saúde de Galicia e contribúe eficazmente á consecución dos obxectivos fundacionais, recabando o apoio das entidades públicas e privadas para os seus fins, realizando labores de difusión e divulgación da actividade investigadora dos centros de investigación de Galicia, aumentando progresivamente de este modo a súa capacidade para competir e a calidade de súa produción científica.

Que o IISGS, é unha entidade sen personalidade xurídica propia que se conforma actualmente mediante a asociación das Áreas Sanitarias do Sur de Galicia, que engloba os centros de atención hospitalaria, atención especializada e atención primara das Áreas Sanitarias do Sur de Galicia coa Universidade de Vigo. Entre as súas principais funcións está fomentar a colaboración entre investigadores do ámbito básico, clínico, de saúde pública e de servizos de saúde; Promover a investigación traslacional e a innovación que teñan aplicacións e repercusións clínicas e; Fomentar a colaboración entre os centros de investigación das entidades que integran o IISGS e outros pertencentes a outras institucións de investigación no ámbito autonómico.

Que o Instituto de Saúde Carlos III, organismo público de investigación con carácter de organismo autónomo, dos previstos no artigo 84.1 a) da Lei 40/2015, do 1 de outubro, do Réxime Xurídico do Sector Público, e cuxa misión é desenvolver e ofrecer servizos científico-tecnolóxicos da máis alta calidade dirixidos ao Sistema Nacional de Saúde e ao conxunto das sociedades, é o organismo xestor das actividades da Acción Estratéxica en Saúde (AES).

A AES ten como obxectivo principal fomentar a saúde e o benestar da cidadanía, así como desenvolver os aspectos preventivos, diagnósticos, curativos, rehabilitadores e paliativos da enfermidade, reforzando e incrementando para iso a competitividade internacional da I+D+i do Sistema Nacional de Saúde e das empresas relacionadas co sector e execútase a través de convocatorias competitivas anuais que desenvolven os programas de actuación anuais dos



diferentes Programas Estatais.

Que as convocatorias da AES están dirixidas aos Institutos de Investigación sanitaria que deberán presentar solicitudes para os grupos de investigación adscritos a estes e pertencentes a calquera das institucións asinantes do convenio de constitución do mesmo. O centro de realización da actividade será o citado Instituto, excepto nos contratos que impliquen actividade asistencial en que esta se desenvolverá en centros asistenciais con actividade clínico-asistencial: hospitais, centros de atención primaria, outros centros asistenciais distintos dos anteriores con licencia de actividade sanitaria expedida pola autoridade competente, pola contratación de profesionais se desenvolverá, exclusivamente, en entidades sanitarias de titularidade pública.

Que o 10 de decembro de 2024 o Instituto Carlos III ditou resolución pola que se aproba a convocatoria correspondente ao ano 2025 mediante tramitación anticipada de concesión de subvencións da Acción Estratéxica en Saúde 2024-2027, e que, por iso, o convenio asinado establece o procedemento polo que se levará a cabo a contratación polo Servizo Galego de Saúde das persoas facultativas especialistas, diplomadas universitarias ou graduadas en Enfermaría, Odontoloxía ou en Fisioterapia, ou nas categorías sanitarias que se establezan na convocatoria da AES, que foran seleccionadas na correspondente resolución de concesión de axudas, para realizar parte da actividade clínico-asistencial ao mesmo tempo que desenvolvan actividades de investigación.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de abril de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estimouse xustificado o recurso á sinatura do instrumento convencional, con exclusión doutras figuras.

E para que conste, asíñase esta memoria, en Santiago de Compostela.

